

HONDAKINAK KUDEATZEKO EREDU PROPIO BAT GARATZEKO BIDEAN, HONDAKINEN TRATAMENDU ZERBITZUA EMATEKO DAUDEN AUKERAK AZTERTZEA

Hiri hondakinak kudeatzeko modua adostu ezinda dabil Gipuzkoa azken urte luzeetan. Modu sinplean esanda, bi ereduren arteko talka azalera da: batean, erraustegia ezinbesteko azpiegituratzat hartzen da; bestean, erraustegirik gabeko eredu baten alde egiten da, murriztea, berrerabiltzea, eta birziklatzea ardatz hartuta.

Eztabaida bizi-bizi dagoela, *2002-2016 Gipuzkoako Hiri Hondakinak Kudeatzeko Plan Orokorri* (GHHKPOri) iritsi zaio iraungitze-data. Bukatu da aurreko plana; horregatik 2017-2030 epealdirako planaren diseinua ekarri du Foru Aldundiak Gipuzkoako agendara. Epemuga horrek aukera bat dakar: gipuzkoarrok hondakin politikaren lantzeko eta adosteko aukera berri bat dugu.

Bien bitartean, ordea, erraustegia eraikitzearen egitasmoari bere horretan eusten dio gaur egungo Foru Aldundiaren gobernu-taldeak, premiazko prozedurak azken muturreraino behartuta.

Bide bihurri horretan, azpimarratzekoak dira Gipuzkoako Hondakin Kontsultazioaren erraustegia eraikitzearen onartu nahi duen kontratu-eredua eta horren arabera baldintzak. Hona hemen ezaugarri batzuk:

- Enpresa-elkarte bati esleituko zaizkio erraustegiaren eraikuntza, martxan edukitzea, mantentzea, eta bestelako finantza-gastuak.
- 35 urtetan ordainduko zaizkio enpresari bere zerbitzuak. Epe horretan enpresak ez du inolako arriskurik hartzen eta irabaziak guztiz bermatuta dauzka. Zama guztia gipuzkoarrok ordainduko dugu.
Gainera, edozein dela ere hondakin bilakaera, loturaren baldintzek ez dute atzera bueltarik.
- Disponibilitatearen arabera ordainduko zaio enpresari. Urtero ordaindu beharreko 32 milioi euroetatik 29 (%90etik gora) erabilgarri egoteagatik ordainduko dira eta gainontzeko apurra hara eramaten diren hondakin tonen arabera. Hau da, biztanleka egingo da ordaindu beharrekoaren kalkulua, zenbat birziklatzen den aintzat hartu gabe. Jakina, horrek birziklatzen dugun herriok kaltetzen gaitu, eta galdera gaizto bat elikatzen du: zertarako birziklatu?
Azken urteotan Gipuzkoan landu den joera eredarria zapuztu egiten du.
- Denera, 1568 milioi euroko dirutza da lizitazioan onartuko dena, eta horietatik 1407 milioi euro (ia guztia) administrazioak jarriko ditu.
- Eskusibitatearen printzipioa aplikatuta, herri guztietako hondakinak Gipuzkoako Hondakin Kontsultazioaren esku uztera derrigorren gaituzte. Derrigorra da, ez aukera. Hala, geure eredu propioa garatzeko eskubidea ukatu egiten digute.
- Beraz, herritarrok jasango ditugu erraustegiaren osasun ondorio kaltegarriak, diruz larrutik ordainduko dugu, eta gainera ez dugu aukerarik izango bestelako ereduak martxan jartzeko.

Testuinguru honetan, Zaldibiak eredu jasangarri baten aldeko apustua eginga du eta, Zero Zabor bidearekin konpromisoa hartuta, urrats sendoak ematen ari gara norabide honetan.

Ikusita Zaldibiak ez daukala toki egokirik gaur egungo Gipuzkoako hondakinen arkitektura instituzionalean, eta herritarren aurrean dugun arduragatik eta zor diegun errespetuagatik, honako erabakia egiten dio gobernu-taldeak udalbatzari:

PROPOSAMENA

LEHENENGOA: Zaldibiako Udalak Zaldibiako hondakinen tratamendua bideratzeko azterketa integrala, aspektu sozial, juridiko, tekniko era ekonomikoa landuko dituen espedienteari hasiera emateko aurrekontuak eskatzea eta nahiko kontsignazio bada, espedienteari ekitea. Azterketa horrek gaur egun Sasieta Mankomunitateko kide gisa ematen den zerbitzua Toki Araubidearen Oinarriak Arautzen dituen 7/1985 legeak 85.artikuluari aurreikusten dituen kudeaketa sistemetako baten bidez (zuzeneko edo zeharkako) ordezkatzeko aukera eta bideak aztertuko ditu.

BIGARRENA: horretarako, azterketa-batzorde bat eratzea, hondakinen tratamenduaren inguruko alderdi sozial, juridiko, tekniko eta finantzarioari buruzko azterketa egin dezan eta memoria bat presta dezan bi hilabeteko epean, eta gehienez ere beste bi hilabeteko luzapenarekin. Batzorde horretako zinegotzi eta teknikari kideak dekretu bidez izendatuko dira.

HIRUGARRENA: 2017-2030 epealdirako Gipuzkoako Hiri Hondakinak Kudeatzeko Plan Orokorra diseinatzeko aukera iritsi dela probestuz, eta Zaldibiak ere Hondakinen tratamendurako beste eredu baten azterketa abian jarriko duela kontuan harturik, Zubietan eraiki nahi den Erraustegiaren esleitze prozeduraren moratoria eskatzea.

LAUGARRENA: erabaki hau Gipuzkoako Foru Aldundiari eta Sasieta Mankomunitateari jakinaraztea.

Zaldibian, 2016ko uztailaren 27an



ZALDIBIKO UDALA
(Gipuzkoa)

Joxan Etxabe Nazabal

Zaldibiako Alkatea